

Hungadonan di bowling a clasifica pa Weganan Pan Americano 2015

ORANJESTAD - Den e fin di siman cu a pasa, Aruba ta logra marca historia un biaha mas den deporte, ora cu e hungadonan di bowling, esta Kamilah Dammers y Thashaina Seraus, a logra un medaya di plata den e competencia di Pabcon Pan Americano Femenino 2014 teni na Cali, Colombia.

Durante henter e tres dianan di competencia, tanto Kamilah como Thashaina a sa di keda cerca di e top mundial den e deporte di bowling. Un prestacion di kita sombre ta loke e dos atletanan a demostra durante di e competencia aki. Tanto den e competencia individual, duo y trio Aruba a muestra cu indudablemente e ta pertenece entre e miho paisnan di e continente America, unda a enfrenta e miho hungadonan di bowling den e continente aki.

Mas cu claro esaki a culmina cu e medaya di plata conkista den duo. Guia pa coach James Porter, e atletanan a sa na haci un bon papel, unda nan ta vence e otro duonan di entre otro Canada, Puerto Rico, Mexico, Republica Dominicana, Guatemala, Costa Rica y Colombia.

Den e ultimo añanan e deporte di bowling a mehora den bon forma y den tur categoria mientras cu durante competencianan internacional nos atletanan ta briya, logrando resultadonan impresionante. Cu e resultado final di Pabcon, Aruba ya caba a clasifica pa e Weganan Pan Americano di 2015, cu lo wordo teni otro aña na Toronto, Canada. □

